



JU UNIVERZITET U ZENICI

KODEKS PONAŠANJA I ODIJEVANJA NA UNIVERZITETU U ZENICI

Zenica, oktobar 2023. godine

Na osnovu člana 56. stav (2) tačka r) Zakona o visokom obrazovanju („Službene novine Zeničko dobojskog kantona“, broj: 12/22) i člana 67. stav (2) tačka kk) Statuta Univerziteta u Zenici (Prečišćeni tekst), na prijedlog Rektora Univerziteta u Zenici, Senat Univerziteta u Zenici na svojoj 8/23 sjednici održanoj 31.10.2023. godine, donio je

KODEKS PONAŠANJA I ODIJEVANJA NA UNIVERZITETU U ZENICI

PRVI DIO – OSNOVNE ODREDBE

Član 1.

(Predmet Kodeksa)

- (1) Kodeksom ponašanja i odijevanja na Univerzitetu u Zenici (u daljem tekstu: Kodeks) utvrđuju se opća pravila i principi ponašanja i odijevanja univerzitetskog osoblja i studenata koja su u skladu sa etičkim, moralnim i profesionalnim normama, te opšte prihvaćenim civilizacijskim vrijednostima.
- (2) Kodeks sadrži pravila ponašanja osoblja Univerziteta u Zenici (u daljem tekstu: Univerzitet) u njihovom međusobnom odnosu i u odnosu prema studentima i strankama, pravila ponašanja studenata međusobno i prema osoblju Univerziteta, te pravila odijevanja osoblja Univerziteta i studenata na Univerzitetu.

Član 2.

(Svrha Kodeksa)

Cilj donošenja Kodeksa je normiranje prihvatljivog načina ponašanja i odijevanja osoblja i studenata Univerziteta, koji će dostoјno prezentovati Univerzitet kao mjesto odgajanja budućih glavnih nosilaca društvenih aktivnosti.

Član 3.

(Principi ponašanja)

Osoblje Univerziteta i studenti su dužni poštivati sljedeće principe ponašanja:

Profesionalno ponašanje – u svom djelokrugu osoblje Univerziteta postupa profesionalno, savjesno i odgovorno poštivajući načela objektivnosti, nepristrasnosti i uvažavanja.

Profesionalni odnos osoblja Univerziteta prema studentima – podrazumijeva poštivanje digniteta ličnosti studenata, spremnost na pružanje podrške i pomoći studentima u nastavnom i naučnoistraživačkom/umjetničkoistraživačkom procesu.

Profesionalni odnos studenata podrazumijeva poštovanje osoblja Univerziteta, kao i međusobno poštivanje, redovno i odgovorno ispunjavanje svojih obaveza u nastavnom i naučnoistraživačkom /umjetničkoistraživačkom procesu.

Poštivanje institucije – poštivanje Univerziteta se očituje kroz dosljedno poštovanje i primjenu svih pravnih propisa, prije svega Okvirnog zakona o visokom obrazovanju u Bosni i Hercegovini, Zakona o visokom obrazovanju Zeničko-dobojskog kantona, Statuta Univerziteta u Zenici (Prečišćeni tekst), Etičkog kodeksa i drugih internih akata visokoškolske ustanove/organizacione jedinice.

DRUGI DIO – KODEKS PONAŠANJA I ODIJEVANJA

Član 4.

(Profesionalno ponašanje osoblja Univerziteta)

Profesionalno ponašanje univerzitetskog osoblja podrazumijeva:

- (a) Osoblje Univerziteta je dužno poštovati ovlaštenja i odgovornosti, hijerarhiju i organizacijsku strukturu Univerziteta.
- (b) Osoblje Univerziteta je obavezno da pravilno, tačno i blagovremeno obavlja zadatke i poslove svog radnog mesta određene stručnom spremom i odgovarajućim kompetencijama.
- (c) Osoblje Univerziteta je obavezno da izbjegava i suzdržava se od onih radnji i postupaka koji na bilo koji način nanose štetu ugledu Univerziteta.
- (d) Svaka radna obaveza koju izdaje nadređena osoba sukladno svojim diskrecionim ovlaštenjima, mora biti jasno formulirana, utemeljena na zakonskim aktima i sa preciznim i realnim rokovima za izvršenje.
- (e) Akademska komunikacija, podrazumijeva oslovljavanje sa „Vi“, kako između članova osoblja Univerziteta, tako i u odnosu univerzitetsko osoblje i studenti.
- (f) U ophodjenju sa studentima i međusobno, univerzitetsko osoblje je dužno postupati profesionalno, pristojno, ljubazno, uz puno poštovanje ličnosti i dostojanstva sagovornika.

Član 5. **(Profesionalno ponašanje studenata)**

Profesionalo ponašanje studenata podrazumijeva:

- (a) Studenti su dužni da dolaze na predavanja i vježbe bez kašnjenja, propisno odjeveni.
- (b) Studenti su dužni poštovati akademsku sredinu i uvažavati principe nenasilne komunikacije u nastavnom i naučnoistraživačkom /umjetničkoistraživačkom procesu.
- (c) Za vrijeme nastavnog procesa studentima nije dozvoljeno korištenja mobilnog telefona i drugih tehničkih aparata izuzev u nastavne svrhe.

Član 6. **(Pravila odijevanja univerzitetskog osoblja i studenata)**

- (1) Univerzitetsko osoblje i studenti su dužni biti uredni i prikladno odjeveni, tako da svojim izgledom ne narušavaju ugled Univerziteta.
- (2) Kodeksom je predviđen poslovno - ležerni stil odijevanja u cilju očuvanja ugleda i tradicije Univerziteta. Univerzitskom osoblju, studentima i trećim licima nije dozvoljeno na Univerzitetu nositi: odjeću koja otkriva stomak, leđa ili duboki dekolte; odjeću bez rukava; odjeću na bretele; prozirnu i tjesnu odjeću; mini suknju, bermude, šorc i trenerku; papuče i natikače.
- (3) Univerzitetsko osoblje i studenti na eksperimentalnim i kliničkim vježbama obavezni su: nositi bijeli mantil, propisane dužine i zakopčan; imati uredne i podrezane nokte i urednu i podvezanu kosu.
- (4) Pravila iz stavova (1), (2) i (3) odnose se i na treća lica koja dolaze u prostore Univerziteta.

ČETVRTI DIO – POŠTIVANJE OBILJEŽJA/IMOVINE INSTITUCIJE

Član 7. **(Javno istupanje)**

- (1) Osoblje i studenti Univerziteta su dužni voditi računa o svom ponašanju i izvan prostora Univerziteta, na javnim mjestima, istupanjima/nastupanjima u javnosti, pazeći na svoj lični ugled i ugled Univerziteta.
- (2) Osoblje i studenti Univerziteta, koji su ovlašteni javno istupiti/nastupiti u ime Univerziteta, dužni su istaknuti da izlažu stajalište Univerziteta.
- (3) U svim oblicima javnih istupa/nastupa i drugim oblicima djelovanja s ciljem predstavljanja Univerziteta očekuje se postupanje u skladu sa najvišim etičkim i profesionalnim standardima.

Član 8. **(Imovina Univerziteta)**

- (1) Zabranjeno je koristiti službene oznake.
- (2) Univerzitetsko osoblje i studenti su obavezni povjerena materijalna i finansijska sredstva u vršenju njihovih poslova koristiti namjenski i ekonomično, isključivo za obavljanje poslova u okviru svog radnog mjesta.
- (3) Svako otuđivanje, pronevjera, uništavanje i oštećenje imovine Univerziteta u Zenici nepažljivim rukovanjem i nemarnim odnosom prema radu, kao i neovlašteno korištenje, strogo je zabranjeno.

Član 9. **(Poslovne informacije)**

- (1) Informacije i podaci koji za poslovanje Univerziteta u Zenici imaju iznimnu važnost smatraju se poslovnom tajnom, a njihovo otkrivanje neprihvatljivim ponašanjem.
- (2) Od univerzitetskog osoblja i studenata se očekuje da se prema povjerljivim podacima odnose odgovorno i savjesno, te da ih u radu koriste isključivo prema svojim ovlaštenjima.

Član 10. **(Zloupotreba položaja od strane univerzitetskog osoblja i studenata)**

Osoblje Univerziteta i studenti dužni su poštivati sljedeće:

- (1) Osoblje Univerziteta i studenti ne smiju sudjelovati u finansijskim i drugim aktivnostima koje mogu štetiti poslovanju, interesu, ugledu i dobrobiti Univerziteta u Zenici, kao i svim situacijama u kojim je lični interes u sukobu s poslovnim.
- (2) Osoblje Univerziteta sa diskrecionim pravom donošenja odluka dužno je odluke donositi tako da ne dođu u položaj koji ih obavezuje na uzvratne usluge ili radnje koje štete ugledu Univerziteta.
- (3) Osoblje Univerziteta i studenti ne smiju primati ili davati poklone ili usluge koje donose korist, izuzev Zakonom propisanih protokolarnih poklona.

(4) Ukoliko se osoblju Univerziteta ponudi poklon ili usluga koja donosi korist, dužan ju je odbiti i sačiniti službenu zabilješku, ako je moguće sa svjedocima, koju prosljeđuje rukovodiocu.

Član 11.

(Politički angažman)

(1) Osoblje Univerziteta u vršenju svojih dužnosti slijedi pravilo političke neutralnosti.

(2) U službenim prostorima Univerziteta nije dopušteno:

– isticanje simbola i propagandnog materijala i

– aktivnost političkih stranaka.

Član 12.

(Konzumiranje duhana, duhanskih prerađevina i alkohola)

(1) U službenim prostorima Univerziteta nije dozvoljena upotreba duhana i duhanskih prerađevina, izuzev u prostorijama predviđenim za te namjene.

(2) Unošenje alkoholnih pića u radne prostorije, konzumiranje alkohola i opijanja na radnom mjestu, kao i dolazak na posao u pijanom stanju najstrožije je zabranjeno.

ŠESTI DIO – PRELAZNE I ZAVRŠNE ODREDBE

Član 13.

(Primjena Kodeksa)

(1) U slučaju nepoštovanja Kodeksa od strane osoblja Univerziteta, rukovodilac organizacione jedinice dužan je usmeno upozoriti člana univezitetorskog osoblja na obavezu poštivanja ovog kodeksa. U slučaju ponavljanja povrede odredaba Kodeksa moguće je pokrenuti disciplinski postupak.

(2) U slučaju nepoštovanja Kodeksa od strane studenata rukovodstvo Univerziteta i njegovih organizacionih jedinica, kao i akademsko osoblje dužni su usmeno upozoriti studenta na obavezu poštivanja Kodeksa, a u slučaju ponavljanja povrede odredaba ovog Kodeksa moguće je pokrenuti disciplinski postupak.

Član 14.

(Tumačenje odredbi Kodeksa)

U slučaju neslaganja strana u tumačenju i primjeni Kodeksa, autentično tumačenje daje Senat Univerziteta.

Član 15.

(Nadzor nad primjenom Kodeksa)

Nadzor nad provođenjem ovog Kodeksa vrše rukovodioci, odnosno nadređeni po hijerarhiji Univerziteta/organizacionih jedinica ili lica koja oni odrede/ovlaste.

Član 16.

(Stupanje na snagu Kodeksa)

Ovaj Kodeks stupa na snagu danom donošenja i bit će objavljen na oglasnoj ploči i web stranici Univerziteta, te će biti dostupan osoblju i studentima.

Broj: 01-02-1-3941/23

Predsjedavajuća Senata Univerziteta u Zenici

Zenica, 31.10.2023. godine

Prof.dr.sc. Larisa Velić

UNIVERZITET U ZENICI**REKTORAT****- SENAT -**

Broj: 01-02-1-3941/23

Zenica, 31.10.2023. godine



Na osnovu člana 56. stav (2) tačka r) Zakona o visokom obrazovanju („Službene novine Zeničko-dobojskog kantona“, broj: 12/22) i člana 67. stav (2) tačka kk) Statuta Univerziteta u Zenici (Prečišćeni tekst), na prijedlog Rektora Univerziteta u Zenici, Senat Univerziteta u Zenici na svojoj 8/23 sjednici održanoj 31.10.2023. godine, donio je

ODLUKU**Član 1.**

Ovom Odlukom usvaja se Kodeks ponašanja i odijevanja na Univerzitetu u Zenici.

Član 2.

Odluka stupa na snagu danom donošenja, a za njenu realizaciju zaduženi su rukovodioci, odnosno nadređeni po hijerarhiji Univerziteta/organizacionih jedinica ili lica koja oni odrede/ovlaste.

Predsjedavajuća Senata Univerziteta u Zenici

Prof.dr.sc. Larisa Velić

Dostavljeno:

8x Fakulteti Univerziteta u Zenici

1x Institut "Kemal Kapetanović" Univerziteta u Zenici

1x Studentski centar Univerziteta u Zenici

1x Rektor Univerziteta u Zenici

1x a/a